

四庫全書

史部

欽定四庫全書

史部

蜀中廣記卷一百一  
四至

詳校官編修臣翟 棟

編修臣程嘉謨覆勘

總校官庶吉士臣何思鈞

校對官學正臣陳 本

謄錄監生臣曹錫爵

欽定四庫全書

蜀中廣記卷一百一

明 曹學佺 撰

詩話記第一

呂覽云禹行功見塗山氏之女禹未之遇而巡省南土  
塗山氏之女乃令其妾待禹于塗山之陽女乃作歌歌  
曰候人兮猗始作為南音文心雕龍南音始于候人此  
三言詩之始也

詩大雅韓奕之篇曰奕奕梁山惟禹甸之有倬其道韓侯受命河圖括地象曰岷山之首江出其腹帝以會昌神以建福此四言之始也

揚子雲蜀都賦兩江珥其市九橋帶其流諸葛孔明書去婦不顧門委韭不入園華陽國志稱姜士游感物寤靈禽堅精動殊俗此皆有似于詩者五言之始也若夫習習神風動澍雨潤乎苗我后卹時務我民以優饒混混濁沼魚習習激清流溫溫亂國民業業仰前修以備



諷刺何媿風雅

禹玉牒詞祝融司方發其英沐日浴月百寶生司馬相  
如琴歌鳳兮鳳兮歸故鄉遨遊四海求其凰此七言之  
始也

古逸詩綏山謠得綏山一桃雖不得仙亦足以豪華陽  
國志三秦亡范三侯我雖牧犢當得蜀此風謠之始也  
卓文君白頭吟皚如山上雪皎如雲間月聞君有兩意  
故來相決絕巴東女兒子歌巴東三峽猿鳴悲夜鳴三

聲淚沾衣我欲上蜀蜀水難踴蹠珂頭腰環環此閨情之始也

漢書王褒為益州刺史命王褒作中和樂職選好事者依鹿鳴習而歌之時汜鄉侯何武為童子選在歌中西南夷傳益州刺史朱輔宣示漢德威懷遠夷自汶山以西前世所不至正朔所未加白狼槃木等百餘國皆舉踵稱臣白狼王唐菆作詩三章歌頌漢德輔使譯而獻之華陽國志巴渝人助武王伐紂前歌後舞及為漢前

鋒陷陣銳氣喜舞帝善之令樂人習學之今所謂巴渝舞也英雄記曹公破袁譚馬上舞三巴此樂府歌舞之始也

宋玉之高唐神女司馬相如之上林子虛揚子雲之蜀都此賦之始也

西京雜記司馬相如為上林子虛賦意思蕭散不復與外事相關控引天地錯綜古今忽然如睡煥然而興幾百日而後成其友人盛覽字長通牂柯名士嘗問以作

賦相如曰合纂組以成文列錦繡而為質一經一緯一宮一商此賦之迹也賦家之心苞括宇宙摠覽人物斯乃得之於內不可得而傳覽乃作合組歌列錦賦而退終身不復敢言作賦之心矣

又云相如賦時皆稱典而麗雖詩人之作不能加也揚子雲曰長卿賦不似從人間來其神化所至邪

又云人問揚子雲作賦之法子雲曰熟讀千首賦則可入矣

惟寂惟莫自投于閣爰清爰靜無作符命此譏子雲作也宋孫明復曰太玄一書乃明天人始終之理君臣上下之分益疾莽而作也王介甫諸家以年數考之謂子雲與莽不相及上符命投閣恐係谷子雲事鑿鑿有據是何世人忍于污蔑賢者如此近日李本寧移書示予謂其在川西以此段書之墨池上乃與當時意見不合後竟入彈章噫不但賢者被誣即代辨誣之人亦被禍矣可一慨歎 桓譚新語雄作甘泉賦夢腸出收而納之卒

秦宓蜀隱士後為益州別駕有遠游詩如虎則豹之兄  
鷹則鷂之弟大都荒唐謬悠之說猶對吳使天口天首  
之故智也然其博學多聞自有不可掩者及與王商論  
立祠堂書尤為典確予倣而行之並祠嚴李揚馬文表  
子勅于丈機石

劉巴零陵人仕蜀為尚書令蜀策命皆其筆也建武二  
年出鎮荊州卒葬于岳陽之郭西時人為之語曰生居  
三湘頭死葬三湘尾以巴墓在遂號岳陽為巴陵云出

古今詩話

左思別傳云思作三都賦疾中猶改蜀都賦云金馬電  
發于高岡碧山振翼而雲披鬼彈飛丸以礮礮火并騰  
光而赫曦今本無鬼丸句水經注瀘水傍瘴氣特惡氣  
中有物不見其形其作有聲中木則折中人則害名曰  
鬼彈

又曰左思造張載問岷蜀事交接亦疎皇甫謐西州高  
士摯仲治宿儒知名非思倫匹劉淵林衛伯輿並蚤終

皆未嘗為思序注凡諸注解悉思自為欲重其文故假借名姓也

王逸少與周益州書司馬相如揚子雲有後否西京雜記載卓文君為相如作誄梁劉孝威詩君平子雲間不嗣江漢英靈信已衰或亦俱寥寥也宋有逃禪子揚補之則自稱子雲後云

晉惠帝時蜀中謠江橋頭闕下市成都北門十八子十八子李也其後李雄據蜀僭號按漢武元鼎二年立太



城九門少城九門故有十八之稱

古今樂錄曰王僧虔技錄有蜀道行今不歌樂府解題  
曰蜀道難備言銅梁玉壘之阻與蜀國弦頗同按蜀國  
弦梁簡文作起句雖言銅梁之險後乃專敘錦城娛樂  
如豫章行吳趨曲之類

巫山高本起于漢樂府吳韋昭宋何承天相沿此題但  
敘其山水之險阻而張侈其國家之功伐也齊王融劉  
繪始以陽臺雲雨入詠梁武帝沈約之倡和則竟為朝

雲曲矣已後作者無慮數百家皆指朝雲

王融巫山高烟華乍卷舒行芳時繼續今本行芳作猿  
鳥猿鳥字遠不及行芳也升菴詩話按詩紀煙華作  
烟霞行芳作衡芳

豆子山打瓦鼓陽平山撒白雨此綿州巴歌也巴歌二  
字纔見此後劉禹錫之竹枝詞李紳之巴女詞皆其變  
體若常璩巴志所引川岷惟平維月孟春等篇則古詩  
者流非通俗之唱矣

杜宇化子鵑蜀本紀華陽國志俱引之其作詩實起於  
鮑照行路難云中有一鳥名杜鵑言是古時蜀帝魂

有兩揚雄兩李膺兩王褒漢揚雄成都人乃作太玄經  
者字從手漢王褒資中人作賢臣頌者晉李膺涪城人  
作益州記者已上皆土著也漢李膺為益州太守褒字  
記云城西三里有李膺宅後周王褒同庾信從益州趙王  
出鎮之蜀褒詩有奉和趙王途中五韻峽路沙如月山  
峰石似眉錦城遙可望迴鞍念此時之句隋揚雄持節

入蜀迎梁主蕭歸者字從木已上皆宦遊也

庾信詩奉和趙王泛江喜雨送軍餞酒等篇不一而足  
想趙王自是作者惜不傳耳杜少陵寓蜀久每以自況  
見諸篇什者曰清新庾開府曰庾信哀雖好曰庾信平  
生最蕭瑟暮年詞賦動江關按庾信哀雖好子美在  
潼川作是時同漢中王游汎故以趙王喻漢中也江關  
係夔府庾信奉和泛江云春江下白帝畫舸向黃牛即  
此地

酈道元水經注曰峨山縣東北有武陽龍尾山並仙者羽化之所於其處得遺詠雖神栖白雲屬想芳流藉念泉鄉遺詠在茲覽其餘誦依然息遠匪直邈想遐踪愛其文詠可念故端牘抽札以詮其詠略曰登武陽觀樂數峨嶺千蕤洋湖口命非螭駕白駒臨天水心踟躕千載後不如此段本註遺失得古逸詩中道書所載平蓋觀稠稂治皆武陽境

公孫述改益州為庸部本牧誓庸蜀羌髳之文也晉傳

玄樂府曰惟庸蜀僭號天一隅云蜀檣杙孟景永遍栽芙蓉于錦城顧左右曰此真錦城也庸蜀蓉城兩有出處今簡牘中有稱蓉蜀者非

梁簡文艷瀕歌曰艷瀕大如馬瞿塘不可下金沙浮轉多桂浦忌經過鄭樵云天下水之險者惟蜀之瞿塘百粵之桂浦此歌言行瞿塘者準艷瀕行桂浦者準金沙也楊用修以為商估刺水行舟歌非簡文之作俗本改桂浦作桂楫尤非按艷瀕一作淫預一作猶豫載各不同

北史常景淹滯門下積歲不至顯官以蜀司馬相如王  
褒嚴君平揚子雲皆有高才而無重位乃作四君贊以  
托意按宋鮑照仕亦不達有作蜀四賢詠但照合四賢  
為一篇景則人自為詠也

陰鏗江津送劉光祿不及詩依然臨送渚長望倚江津  
鼓聲隨聽絕帆勢與雲鄰泊處空餘鳥離亭已散人林  
寒正下葉釣晚欲收綸如何相背遠江漢與城闔舊志  
未及收之或以江津二字汎汎未必為蜀之江津也然

此詩語意明係蜀中而江漢正蜀地耳

蜀僧作詩起于隋智炫遊三學山一首智炫成都人三學山金堂地也炫自兩京歸隱于此

唐太宗詠秋日詩有云還似成都望直見峨眉前攷唐史太宗蓋嘗遙領益州神想所矚也

王楊盧駱初唐稱四傑無不入蜀中者唐詩紀事稱高宗時王勃以檄雞文斥出沛王府既廢客劍南與盧照鄰邵大震九月九日登玄武山旅眺詩照鄰為新都尉



大震同時人也 子安送杜少府之任蜀州詩城闕輔  
三秦風烟望五津未下注脚不知也丹鉛餘錄云大江  
自渝堰至犍為有五津曰白華津萬里津江首津涉頭  
津江南津出華陽國志王勃詩風烟望五津盧照隣文  
予自江陽言歸五津皆指此然首句亦出華陽國志而  
用修未之引也成都本治赤里街張若徙置少城內廣  
營府舍脩整里闌市張列肆得與咸陽同制此即城闕  
輔三秦之義

楊炯有入三峽詩及梓州官僚磨厓贊

盧照隣詠懷蜀中古蹟如文翁講堂相如琴臺皆是其  
奉使還京宴別綿池諸作不但一尉而已駱賓王艷情  
代郭氏荅盧照隣長篇大似臨邛卓女之怨照隣豈能  
忘情于蜀者耶

賓王入蜀亦以使事至疇昔篇中曾及之其曰地角天  
涯眇難測者成都有此二石也游宦紀聞云今之遠官  
及服賈者皆曰天涯海角蓋俗譚也頃在成都聞有天

涯海角石暇時訪古及閱志圖乃知天涯石在中興寺  
耆老傳云人坐其上則脚腫不能行至今人不敢踐履  
又有天涯石廟在大東門對昭覺寺石高六七尺今市  
入湯家園地角石廟在羅城內西北角高三尺餘王均  
之亂為守城者所壞今不復存矣

賓王送鄭安陽詩彭山折坂外并絡少城隈九折坂在  
邛崃今百丈驛是與彭山同屬上川南相望不遠故云  
遺錦非前邑鳴琴即舊臺遺錦用後漢綿竹令閻憲事

琴臺用相如事海客乘查度仙童馭竹迴一用君平事  
一用葛陂事寰宇記葛陂在溫雙之境龍池寺是古人  
用事或顯或晦不同如此

陳子昂別傳云幽人王適見其感遇詩曰是必為海內  
文宗矣按適蜀中旅懷詩有時須問影無事則書空棄  
置如天外平生似夢中別離同夜月愁思隔秋風老少  
悲顏駟盈虛悟翟公益因入蜀而見子昂也

獨異記載子昂初入京不為人知有賣胡琴者價百萬

豪貴傳視無辨者子昂笑出謂左右曰輦千緡市之衆  
驚問荅曰予善此樂皆曰可得聞乎曰明日可集宣陽  
里如期偕往酒肴畢具置胡琴于前食畢捧琴語曰蜀  
人陳子昂有文百軸馳走京轂碌碌塵土不為人知此  
樂賤工之役豈宜留心舉而碎之以其文軸遍贈會者  
一日之內聲華溢都

盧藏用悼陳子昂詩云暮川罕停波朝雲無留色故人  
琴與詩可存不可識識心尚可親琴書非故人鳴臯初

夢趙蜀國已悲陳按此則亦詠其碎琴事也

殷璠詩品國初詞體尚沿徐庾後靡之風陳拾遺橫制  
頽波天下質文翕然一變

蘇頲將赴益州題小園壁歲窮惟益老春至却辭家可  
惜東園樹無人也作花宋璟鄭惟忠俱有詩送之亦絕  
句也小許公有長樂花賦即蜀之旌節花

王右軍誓墓之後猶云奉使關蜀無不從命與周益州  
書可想見也唐初尚此風味若徐安貞蘇許公劉希夷

賈至張燕公張曲江王摩詰無不以冊使招諭至者孟  
襄陽則從左相幕中

張九齡送宋休遠之蜀任詩色麗成都俗膏腴蜀水濱  
如何從宦子堅白共緇磷王維送崔興宗亦云江漢風  
流地遊人何處歸宋子京知益州朝議以成都喜遨遊  
子京性復奢侈恐無紀極今殊不然

王維送李梓州詩萬壑樹叅天千山響杜鵑山中一夜  
雨樹杪百重泉楊用修詩林振秀作山中一文雨潼川

志作山中一半雨千山響杜鵑作春聲響杜鵑方輿勝  
覽作鄉音響杜鵑不知何所適從 漢女輸槿布李周  
翰曰漢女蜀之美女也漢書曰秦置黔中郡漢興令大  
人輸布一疋小口二丈是謂賓布即今槿花布也

十六國春秋云宕渠古賓國姓羊駱賓王詩迢迢羊路  
望芝田本此

孟浩然途中晴詩已失武陵雨猶逢蜀坂泥天開斜景  
遍山出曉雲低餘濕猶霑草殘流尚入谿今宵有明月



鄉思遠淒淒此曲盡蜀中之境非親到者不知

除夜有懷迢遞三巴路羈危萬里身或收作孟浩然非此崔塗作也塗蓋赴舉入蜀云

詩史云韓襄客者漢安女子為歌詩知名江漢間孟浩然贈詩曰只為陽臺夢裡狂降來教作神仙客襄客閨怨詩曰連理枝前同設誓丁香樹下共論心先公熙寧中逐金使成堯錫見遺衣服刺此聯于褰肚上其下復刺丁香連理男女設誓之狀蓋金人重此句為佳製云

按此與梅聖俞春雪詩同漢安今內江縣後周名

裴迪初與王維崔興宗同居終南天寶後王縉為蜀州刺史迪依之與杜甫友善寓新津昭覺寺有唱和

天寶末玄宗嘗乘月登勤政樓命梨園弟子歌數闋有唱李嶠詩云富貴榮華能幾時山川滿目淚沾衣不見祇今汾水上惟有年年秋鴈飛時上春秋已高問是誰詩或對曰李嶠因淒然泣下不終曲而起曰李嶠真才子也明年幸蜀登白衛嶺覽眺久之又歌是詞復言李

嶠真才子不勝感嘆時高力士在側亦揮涕久之出本  
事詩

雨淋鈴明皇自西蜀返樂人張野狐所製出教坊記

明皇幸蜀劉長卿亦常侍從故有送史判官奏事之靈  
武兼寄巴西親故詩時肅宗權制靈武也閬中左綿皆  
得稱巴西長卿之親故有入蜀而未至成都者耳詩云  
獨有西歸心遙懸夕陽外

田澄成都旅次云地富魚為米山芳桂是樵俗云魚米

之地本此澄天寶上元間人杜工部贈田舍人云揚雄更有河東賦惟待吹噓送上天蓋澄以舍人奉使入蜀也出紀事

武擔平仄二音常璩云毗橋有一折石五丁力士擔土擔也上平而下仄矣蘇頲詩武擔獨蒼然予詩分司武擔南皆用仄音

李白本末傳記所載不同唐史稱白興聖皇帝九世孫隋末以罪徙西域神龍初遁還客巴西既長隱岷山蘇

頤為益州長史見白異之更客任城與孔巢父韓準裴政張叔明陶沔居徂徠山日沈飲號竹溪六逸天寶初南入會稽與吳筠善筠被召故白亦至長安往見賀知章知章見其文嘆曰子謫仙人也

南部新書云李白山東人父為任城尉因家焉少與魯人隱徂徠山號竹溪六逸天寶初遊會稽因吳筠隱剡中俗稱蜀人非也今任城令廳有白之祠尚存按唐范傳正誌白墓曰白涼武昭王九世孫昭王隴西人隋末

子孫以罪徙碎葉神龍時白父客自西域逃居綿之巴  
西而白生焉唐魏顥李陽冰序其文劉全白撰墓碣皆  
曰廣漢人故論白者或曰隴西或曰山東或曰蜀陽冰云白既  
出翰林浪跡縱酒以自昏穢詠哥之際屢稱山東李白亦云  
以張垞讒逐遊海岱間子美所謂汝與東山李白好蓋白自  
號也蜀道難或曰作于天寶初或曰作于天寶末此為房杜  
危之也陸暢去白未遠作蜀道易以美韋皋傳之當時而  
蜀道難之詞曰錦城雖云樂不如早還家其意必有所

屬房杜之說蓋近之矣白之父客于巴西故以客呼之  
東蜀楊天惠彰明逸事云元符二年春正月天惠補令  
於此竊從學士大夫求問逸事聞唐李白本邑人微時  
募縣小吏入令卧內嘗驅牛徑堂下令妻怒將加詰責  
太白亟以詩謝云素面倚簾鉤嬌聲出外頭若非是織  
女何得問牽牛令驚異不問稍親招引侍研席一日賦  
山火詩思輒不屬太白從傍綴其下句令詩云野火燒  
山去人歸火不歸太白繼云焰隨紅日出烟逐暮雲飛

令慙止頃之從令觀漲有女子溺死江上令復苦吟太  
白輒應聲繼之令詩二八誰家女漂來倚岼廬鳥窺眉  
上翠魚弄口傍珠太白繼云綠鬟隨波散紅顏逐浪無  
因何逢伍相應是怨秋胡令滋不悅太白恐棄去隱居  
戴天大匡山往來旁郡依潼江趙徵君綈亦節士任俠  
有氣善為縱橫學著書號長短經太白從學歲餘去遊  
成都賦春感詩云茫茫南與北道直事難諧榆莢錢生  
樹楊花玉糝街塵縈遊子面蝶弄美人釵却憶青山上



雲門掩竹齋益州刺史蘇頲見奇之時太白齒方少英  
氣溢發諸為詩文甚多微類宮中行樂詞體今邑所藏  
百篇大抵皆格律也雖頗體弱然短羽襍褻已有雛鳳  
態淳化中縣令楊遂為之引謂為少作是也遂江南人  
自名能詩累謫為令云始太白與杜甫相遇梁宋間結  
交歡甚久乃去客居魯徠山甫從嚴武成都太白益  
流落不能歸故甫詩又云匡山讀書處頭白好歸來然  
學者多疑太白為山東人又以匡山為匡廬皆非也今

大匡山猶有讀書臺而清廉鄉故居遺地尚在廢為寺  
名隴西院有唐梓州刺史碑失其名及綿州刺史高杞  
記太日子曰伯禽女曰平陽皆去蜀後生有妹月圓前  
嫁邑子留不去以故葬邑下墓今在隴西院旁二百步  
外或傳院乃其所捨云

李白開元中謁宰相封一版上題曰海上釣鰲客李白  
相問曰先生臨滄海釣巨鰲以何物為釣線曰以風浪  
逸其情乾坤縱其志以虹霓為絲明月為鉤又曰何物

為餌曰以天下無義氣丈夫為餌丞相竦然出侯鯖錄

李白與人譚論皆成句讀如春葩麗藻粲于齒牙時號李白粲花之論出雲仙雜記

李白前後三擬文選不如意悉焚之惟留恨別賦出瓊屑唐人言李白不能屈身以腰間有傲骨出鼠璞

范傳正作李太白墓誌云白常欲一鳴驚人一飛冲天彼漸陸遷喬皆不能也及其謫退乃嘆曰千鈞之弩一發不中則當摧撞折牙而求息機安能效碌碌者蘇而

復上哉用是脫屣軒冕釋羈韁鎖因肆性情大放于宇宙間意欲耗壯心而遣餘年此數語足以盡白之為人矣劉全白有李翰林墓碣記云太白廣漢人性倜儻知縱橫術善賦詩才調逸邁往往興會屬詞恐古之善詩者亦不逮裴敬有李白墓碑曰白為詩格高旨遠若在天外物外任華送李白之曹南序曰彼碌碌者徒見三河之遊倦百鎰之金盡乃議子于得失虧成之間曾不知才全者無虧成志全者無得失進與退於道德乎何

有以上諸文附見李白集古本有之今不傳矣全白指  
太白為廣漢人蓋唐世彰明縣屬廣漢郡故獨舉郡為  
稱耳出詩話

李太白初自蜀至京師舍于逆旅賀監知章聞其名首  
訪之既奇其姿復請所為文出蜀道難以示之讀未已  
稱歎者數四號為謫仙解金龜換酒與傾盡醉期不間  
日由是稱譽光赫賀又見其烏棲曲嘆賞苦吟曰此詩  
可以泣鬼神矣故杜子美贈詩及馬曲曰姑蘇臺上烏

棲時吳王宮裡醉西施吳歌楚舞歡未畢西山欲銜半  
邊日金壺丁丁漏水盡起看秋月墜江波東方漸高奈  
樂何或言是烏夜啼二篇未知孰是故兩錄之烏夜啼  
曰黃雲城邊烏欲棲歸飛啞啞枝上啼機中織錦秦川  
女碧紗如煙隔窻語停梭向人問故夫欲說遼西淚如  
雨白才逸氣高與陳拾遺齊名先後合德其論詩云梁  
陳以來艷薄斯極沈休文又尚以聲律將復古道非我  
而誰與故陳李二集律詩殊少嘗言興寄深微五言不

如四言七言又其靡也況使束于聲調俳優哉故戲杜  
曰飯顆山頭逢杜甫頭戴笠子日卓午借問別來太瘦  
生總為從前作詩苦蓋譏其拘束也元宗問之召入翰  
林以其才藻絕人器識兼茂便上位處之故未命以官  
嘗因宮人行樂謂高力士曰對此良辰美景豈可獨以  
聲伎為娛倘時得逸才詞人詠出之可以誇耀于後遂  
命召白時寧王邀白飲酒已醉既至拜舞頽然上知其  
薄聲律謂非所長命為宮中行樂五言律詩十首白頓

首曰寧王賜臣酒今已醉倘陛下賜臣無畏始可盡臣  
薄技上曰可即遣二內臣掖扶命研墨濡筆以授之又  
令二人張朱絲欄于其前白取筆抒思晷不停綴十篇  
立就更無加點筆迹適利鳳跋龍拏律度對屬無不精  
絕常出入宮中恩禮殊厚竟以踈縱乞歸上亦以非廊  
廟器優詔罷遣之後以不羈流落江外又以永王招禮  
累謫於夜郎及放還卒於宣城杜甫所贈二十韻備敘  
其事出本事詩



高唐神女事宋蘇子瞻以為瑤姬天帝之女乃助禹治水而成功者本山海經然李太白感興詩曰瑤姬天帝女精彩化朝雲宛轉入宵夢無心向楚君則是已詠言之矣

李白青山橫北郭一首題云送友人作不知其為何人與何地也詩林振秀題下加新津作三字資縣志載此首連見說蠶叢路一首俱作送范金卿還資州作金卿即范崇凱獻花萼樓賦者縣志復收白贈崇凱古風一首

或亦有所本也

太白渡金門詩仍連故鄉水萬里送行舟送人之羅浮  
詩爾去之羅浮余還憩峨眉又淮南卧病懷寄蜀中趙  
徵君蕤詩云國門遙天外鄉路遠山隔朝憶相如臺夜  
夢子雲宅皆寓懷鄉之意趙蕤梓州人字雲卿精于數  
學與白齊名蘇頲薦西蜀人才疏云趙蕤術數李白文  
章出丹鉛餘錄

成都閭邱均在唐初與杜審言齊名杜子美贈其孫閭

邱師詩云鳳藏丹穴暮龍去白水渾蓋稱均之文也按  
成都文類均銅梁人武后朝為太常博士與杜審言同  
年均善書即所云世傳間邱筆峻極逾崑崙者雪嶺多  
其碑碣甫時尚存僧在成都與甫通家來往舊唐書均  
成都人以文章著稱景龍中以安樂公主薦拜官太常  
博士及公主被誅均坐貶循州司倉卒

嚴武年二十二為給事黃門郎明年擁旄西蜀杜甫乘  
醉言不謂嚴挺之乃有此子也武恚目久之曰杜審言

孫子擬捋虎鬚合坐皆笑以彌縫之房太尉瑄微有所  
誤憂怖成疾李太白作蜀道難為房杜危之也武字季  
鷹永泰初卒母哭之曰而今而後吾知免為官婢矣出  
詩話

子美七言絕近百錦城妓女獨唱其贈花卿一首所謂  
錦城絲管日紛紛半入江風半入雲此曲只應天上  
有人間能得幾回聞也蓋花卿在蜀頗僭用天子禮樂  
子美作此諷之意在言外最得詩人之旨

杜石笋行雨多往往得瑟瑟按華陽記開明氏造七寶樓以珍珠結成簾漢武帝時蜀郡火燒數千家樓亦以燼今人往往於砂土上獲真珠又趙清獻蜀都故事石笋在衙西門外二株雙蹲云真珠樓基也昔有胡人於此立寺為大秦寺其門樓十間皆以真珠翠碧貫之為簾後摧毀墜地至今基脚在每有大雨其前後人多拾得珍珠瑟瑟金翠異物今謂石笋非為樓設而樓之建適當石笋附近耳蓋大秦國多璆琳琅玕明珠金璧水

道通益州永昌郡則寺疑此國人所建也杜田嘗引酉陽雜俎謂蜀少城飾以金璧珠翠桓溫怒其太侈焚之事為證出能改齋

四月十九日成都謂之浣花遨頭宴于杜子美草堂滄浪亭傾城皆出錦繡夾道自開歲宴遊至是而止故最盛于它時予客蜀數年屢赴此集未嘗不晴蜀人云雖戴白之老未嘗見浣花日雨也

杜少陵在成都有兩草堂一在萬里橋之西一在浣花

皆見於詩中萬里橋故迹湮沒不可見或云房李可園是也已上二則出老學菴筆記

杜子美愁坐詩曰高齋常見野愁坐更臨門十月山寒重孤城水氣昏葭萌氏種迥左擔犬羊存終日憂奔走歸期未敢論葭萌左擔皆地名葭萌人知之左擔人罕知也注者或改作武擔又改作立擔皆可笑按太平御覽引李尤蜀記云蜀山自綿谷葭萌道徑險窄北來擔負者不容易肩謂之左擔道又李公允益州記云陰平

縣有左擔道其路至險自北來者擔在左肩不得度右肩常璩南中志云自犍道至朱提有水步道水道有黑水及羊官水至險難行步道度三津亦艱阻故行者謠曰猶溪赤木盤蛇九曲盤羊烏櫬氣與天通康隆賈子左擔七里又有牛叩頭馬搏頰坂其險如此據三書是左擔有三綿谷一也陰平二也朱提三也義則一而已朱提今之烏撒雲貴往來之西路也

蜀西南多雨名曰漏天杜子美詩鼓角漏天東又徑欲



誅雲師疇能補天漏是也自秋分後遇壬謂之入雷吳  
下曰入夜宋黃仁傑夔州苦雨詩八月不虛為朽月今  
年賴得是豐年八音讀為怕平聲東方朔傳諧語云令  
壺齟老栢塗塗與八同注云丈加切其下解云塗者漸  
如徑也亦雨濕泥濘之義爾雅十二月為畢塗月八月  
之諺雖俗其音義字形亦遐而尚矣已上二則出升菴詩話  
子美題忠州龍興寺所居院壁詩云忠州三峽內并邑  
聚雲根今其驛名曰雲根驛有筆亦名雲根筆

蜀江三峽中水波圓折者名曰盤盤音滋杜詩盤渦鷺浴底心性張蠡黃牛峽詩盤渦逆入嵌空地斷壁高分繚繞天

唐常徵君隱居開州永泰元年秋杜少陵自忠州至雲安徵君來訪之杜有別徵君詩云兒扶猶策杖卧病一秋強白髮少新洗寒衣寬摠長故人憂見及此別淚相忘各逐萍流轉來書細作行後又寄之詩有云開州入夏知涼冷不似雲安毒熱新故知徵君開人也

覃山人大厯中居夔杜少陵題其隱居詩有北山移文  
誰勒銘及悵望秋天虛翠屏之句則知山人亦出仕矣  
史失其名已上二則出本夔志

杜甫出瞿塘峽詩五雲高太甲六月曠搏扶注不解五  
雲之義嘗觀王勃益州夫子廟碑云帝車南指遁七曜  
于中階華蓋西臨藏五雲于太甲酉陽雜俎謂燕公讀  
碑自帝車至太甲四句悉不解訪之一公一公言北斗  
建午七曜在南方有是之祥則無位聖人當出華蓋以

下卒不可悉愚謂老杜讀書破萬卷自有所據或入蜀見此碑而用其語也晉天文志華蓋杠旁六星曰六甲分陰陽而配節候太甲恐是六甲一星之名然未有攷證以一行之遽於星厯張燕公段柯古之彈見洽聞而猶未知焉姑闕疑以俟博識出困學紀聞

杜少陵遊何將軍山林詩雨拋金鎖甲苔卧綠沉鎗竹坡周少隱詩話云甲拋于雨為金所鎖鎗卧于苔為綠所沉有將軍不好武之意此贅者之言也薛氏補遺云

綠沉精鐵也引隋書文帝賜張淵綠沉之甲趙德麟侯  
鯖錄綠沉為竹引陸龜蒙詩一架三百竿綠沉森杳冥  
雖少有據然亦非也予考之綠沉乃畫工設色之名鄴  
中記云石虎造象牙桃枝扇或綠沉色或木蘭色或紫  
紺色或鬱金色王羲之筆經云有人以綠沉漆管見遺  
南史梁武帝西園食綠沉瓜是綠沉即西瓜皮色也梁  
簡文詩吳戈夏服箭鏃馬綠沉弓虞世南詩綠沉明月  
絃劉劬趙都賦弩有黃間綠沉若如薛與趙之說鐵與

竹豈可為弓絃耶楊巨源詩吟詩白羽扇校獵綠沉鎗  
與杜少陵之句同皆謂以綠沉色為漆飾鎗柄耳

杜子美何將軍山莊詩薰風殿茗時今本作春風非此  
詩十首皆一時作其曰千章夏木清紅綻雨肥梅皆夏  
景可證俱詩話補遺

射洪陸使君廟以杜子美詩為籤亦驗予在蜀以淳熙  
戊戌春被召臨行遣僧則華往求籤得遣興詩曰昔者  
龐德公未曾入州府襄陽耆舊間處世節獨苦豈無濟

時策終竟畏罔罟林茂鳥自歸水深魚知聚舉家隱鹿  
門劉表焉得取予讀之惕然顧迫貧從仕又十有二年  
負神之教多矣出老學菴

杜工部有滕王亭詩王建詩有搨得滕王蛺蝶圖皆稱  
滕王湛然非元嬰也王勃序滕王閣則元嬰耳出醍醐

杜少陵暮登四安寺鐘樓寄裴十即裴秀才迪也寺在  
新津昭覺山樓與雪峰相對是時王縉為蜀州守三人  
蓋朝夕於斯云

詩話云有疾瘡者子美曰吾詩可以療之病者曰云何  
曰夜闌更秉燭相對如夢寐誦之瘡猶是也杜曰更誦  
子章髑髏血模糊手提擲還崔丈夫其人從之果愈  
杜少陵冬日懷李白詩袒褐風霜入惟宋元本仍作袒  
今本皆作短袒音豎字見列子

合璧事類載杜工部詩云三月雪連夜未應傷物華只  
緣春欲盡留著伴梨花此詩舊集不載又寒食少天氣  
春風多柳花又小桃知客意春盡始開花則今之全集



遺逸多矣俱升菴詩話

杜詩云江蓮搖白羽天棘夢青絲下句殊不可曉說者  
曰天棘柳也或曰天門冬也夢當作弄既無考據意亦  
短淺譚浚明嘗為余言此出佛書終南長老入定夢天  
帝賜以青棘之香蓋言江蓮之香如所夢天棘之香耳  
此詩為僧齊己賦故引此事余甚喜其說然終未知果  
出何經近閱葉石林過庭錄亦言此句出佛書則浚明  
之言宜可信出崔林玉露

杜子美玄都壇歌云子規夜啼山竹裂王母晝下雲旗  
翻說者多不曉王母或以爲瑤池之金母也中官陳彥  
和言頃在宣和間掌禽苑四方所貢珍禽不可殫舉蜀  
中貢一種鳥狀如燕色紺翠尾甚多而長飛則尾開裊  
裊如兩旗名曰王母則子美所言乃此禽也蓋遐方異  
種人罕識者子規夜啼山竹裂言其聲清越如竹裂也  
此墨莊漫錄所載余閱峨山記云漢竇誼放浪不羈月  
夜聞子規啼曰竹裂吾可歸峨眉是夕竹裂天明遁去

武帝三徵之不起老杜引此竹裂與旗翻字對始不偏重

焦氏筆乘杜子美本賣文為活翻令室倒懸言其無假借也而語意不露味之愈佳揚子雲家無儋石之儲其作法言蜀人有齎錢十萬願載其名子雲却之故以自況也潛居錄言雄以賣文自贍文不虛美人多惡之及卒其怨家取法言益之曰周公以來未有漢公之懿也勤勞則過于阿衡云云繕寫多行于世

蘇東坡泊舟夔峽聞有人吟江流石不轉遺恨失吞吳

之句曰予杜子美也世人多誤解予詩謂先主伐吳不利以此為恨非也蓋武侯之志在於中原欲結東吳為外援伐之轉失策耳武侯曰若法孝直在可免此行

杜甫子宗武以詩示阮兵曹兵曹荅以石斧一具隨使併詩還之宗武曰斧父斤也兵曹使我呈父加斤削也俄而阮聞之曰誤矣欲子砍斷其手此手若存天下詩名又在杜家矣出雲仙雜記

蜀中廣記卷一百一

欽定四庫全書

蜀中廣記卷一百二

明 曹學佺 撰

詩話記第二

劉賓客嘉話云陸暢謁韋臯於蜀獻蜀道易詩首句曰  
蜀道易易於履平地臯大喜贈羅八百疋臯薨朝廷欲  
繩其既往之事復開先所進兵器其上皆刻之秦二字  
不相與者欲文成罪名暢上疏理之云臣在蜀日見造

所進兵器之秦者匠人名也乃得釋 按此則暢乃有  
心人豈徒事干謁者耶

高相國崇文渤海人本荆門將校尉以平劉闢功授西  
川節度一日雪下集諸從事吟賞謂賓客曰某雖武夫  
亦有一詩乃口札云崇文崇武不崇文提戈出塞號將  
軍那箇髑兒射落雁白毛空裏亂紛紛蓋渤海鄙言呼  
箭為髑兒

高太尉駢崇文曾孫也鎮蜀日以蠻夷侵暴乃築羅城

四十里朝廷雖加恩賞亦疑其固護一日奏樂聞樂聲  
知有改移兆乃題風箏寄意曰夜靜絃聲響碧空宮商  
信任往來風依稀似曲繞堪聽又被風吹別調中旬日  
果移鎮渚宮俱北夢瑣言

聞說邊城苦如今到始知好將筵上曲唱與隴頭兒此  
薛濤在高駢宴上聞邊報樂府也又諷諭而不露得詩  
人之妙使青蓮見之亦當印可元白流紛紛停筆不亦  
宜乎出升菴詩話

元稹聞西蜀薛濤有辭辯及為監察使蜀以御史推鞠  
難得見焉嚴司空潛知其意每遣薛往泊登翰林以詩  
寄曰錦江滑膩蛾眉秀幻出文君與薛濤言語巧偷鸚  
鵡舌文章分得鳳凰毛紛紛詞客多停筆箇箇公侯欲  
夢刀別後相思隔烟水菖蒲花發五雲高白居易有詩  
與薛濤云峨眉山勢接雲霓欲逐劉郎此路迷若似剡  
中容易到春風猶隔武陵溪出古今詩話

予初入蜀見當事者梓薛濤詩一卷云係新都楊家抄



本喜以為秘書也及觀之只五七言絕句而已此在洪  
邁萬首絕句之內且江南有一抄本亦與之同大抵從  
萬首內抄出但蜀本多酬人雨後看竹五言律一首又  
少江南抄本絕句數首亦可互校予叔汝載搜閱簡池  
志載其江月樓詩秋風彷彿吳江冷鷗鷺參差夕陽影  
垂虹納納卧譙門雉堞耽耽俯漁艇陽安小兒拍手笑  
使君幻出江南景又西崑詩凭闌却憶騎鯨客把酒臨  
風手自招細雨聲中停去馬夕陽影裏亂鳴蜩此二首

抄本所無致可喜也

五溪論事云蜀尚書侯繼圖本儒士一日秋風四起偶倚欄于大慈寺樓有大桐葉飄然而墜上有詩云拭翠飲雙蛾為鬱心中事搦管下庭除書成相思字此字不書石此字不書紙書向秋葉上願逐秋風起天下有心人盡解相思死天下負心人不識相思意有心與負心不知落何地侯貯小帖凡五六年方卜任氏為婚嘗諷此詩任氏曰此是妾書葉詩爭得在公處曰向在大慈

寺閣上倚欄得之即知今日聘卿非偶然也侯以今書較之與葉上無異

元稹為御史鞫獄梓潼樂天昆仲送至城西而別後旬日昆仲與李侍郎建間遊曲江及慈恩寺飲酣作詩曰花時同酌破春愁醉折花枝作酒籌忽憶故人天際去計程今日到梁州後旬日得元書果以是日至褒仍寄詩曰夢君兄弟曲江頭也到慈恩寺裏游驛吏喚人排馬去忽驚身在古梁州千里魂交合若符契白有感夢

記備敘其事

秭歸繁知一聞白樂天將過巫山先於神女祠粉壁大書云蘇州刺史今才子行到巫山必有詩為報高唐神女道速排雲雨候清詞及白公覩詩急遣邀知一比至曰中山劉郎中禹錫三年理白帝欲作一詩於此怯而不為罷郡經過悉去舊題千餘但留四章而已此四章者乃古今之絕唱也而今造次不合為之四章謂沈佺期王無競李端皇甫冉也雲溪友議

楊六尚書白樂天妻兄也初除東川節度使白代妻以  
詩賀揚云劉綱與婦共昇仙弄玉隨夫亦上天何似阿  
哥領崔嫂碧油幢引向東川又寒食寄詩云不知楊六  
逢寒食作底歡娛過此辰兜率寺高宜望月嘉陵江近  
好遊春蠻旗如火行隨馬蜀妓如花坐繞身不使黔婁  
夫婦看誇張富貴向何人出本集

段文昌太尉鎮益州有還別業尋龍華山寺廣宣上人  
詩云十里惟聞松柏風江山忽轉見龍宮正與休師方

話舊風煙幾度入樓中郭震亦有題龍華山詩曰昔年  
曾到此山回百鳥聲中酒一杯最好寺邊開眼處段文  
昌有讀書臺

太尉李德裕出鎮渚宮嘗謂賓侶曰余偶欲賦巫山神  
女一詩下句云自從一夢高唐後可是無人勝楚王晝  
夢宵征巫山似欲降者何如段記室成式曰屈平流放  
湘沅椒蘭久而不芳卒葬江魚之腹為曠代之悲宋玉  
則招屈之魂明君之失恐禍及身遂假高唐之夢以惑

襄王非真夢也我公作神女之詩思神女之會惟慮成  
夢亦恐非真李公退慚其文不編集於卷也出雲溪友  
議

該聞錄云段文昌鎮成都子成式好獵丞相患之成式  
以所獲雉兔分送幕僚各致書援引故事甚悉幕僚多  
不曉其義以呈丞相方知其子博學

成式酉陽雜俎云予在城因說故相牛公賞揚州秀才  
蒯希逸詩蟾蜍醉裏破蝴蝶夢中殘每坐吟之予請客

各吟近日佳句因記蜀中客龐季予每云寒雲生易滿  
秋草長難高之句

唐詩記事載樊宗師綿州越王樓詩序云綿之城帝獨  
掀掀明威瀾石硝馳涪瀨左陵凌紅稜替天地送行葵  
壬且掬跼踢于西北蟠紅顏青越王貞故為樓重軒疊  
飛門牕蒙傘塞予始登謂日月昏曉可窺其背電雷合  
風雲逆霜辛露酸星辰介行鬼神變化草木顯綉髻銜  
衰芟皆可察極既縈視其江帶又極視其土崗斷暴遠



近山嶮嶮若閔之東皇天原開見荆山我其黃河曄然  
為曲直淚雨落不可掩因口其心曰無害若其日杲星  
星過歸尚悲不能解重為詩以釋益不可顧謂郡中諸  
君能無有意綴以華艷其念蓄云危樓倚天門如闔星  
辰宮櫟題薄龍怪洄洄繞雷風徂秋試登臨火靄屯喬  
空不見西北路老懷益雕窮石瀨薄濺濺土山杳穹穹  
昔人愴為逝所適酖顏紅今我茲之來猶校成歲功輟  
田植科畝游圃歌芳叢地財無聚厚入室安取豐既乏

富庶能千萬慚文翁宗師字紹述襄陽節度使澤之子  
韓退之誌其墓曰為文必出於己不襲蹈前人一言一  
句此之謂也然紹述此等詩文實不能佳

楚水巴山烟雨多巴人能唱本鄉歌今朝北客思歸去  
回入紆那披綠蘿此劉禹錫竹枝詞也紆那當時曲名  
劉詩翻南調為北調二字皆叶平聲此隨方轉言也

楊柳枝詞有三條陌上拂金羈萬里橋邊映酒旗此日  
令人腸欲斷不堪將入笛中吹此郎中滕邁之作而劉

采春歌之也

鵝花衫子柳花裙多著沉香慢火薰惆悵粧成君不見  
空教綠綺伴文君此李餘臨邛怨也玉輪江上雨絲絲  
公子遊春醉不知剪渡歸來風正急水濺鞍帕嫩鵝兒  
此餘寒食詩也餘成都人元微之稱蜀士李餘劉猛工  
為新樂府餘詩傳者僅此已上俱絕句演義按汶江謂  
之玉輪江

李章武學識好古有名於時太和末勅僧尼試經若干

紙不通者勅還俗章武時為成都少尹有山僧來謁云  
禪觀有年未嘗念經今被追試前業棄矣願長者宥之  
章武贈詩曰南京尚許通方便何處心中更有經好去  
苾芻雲水畔何山松栢青青主者見詩免之而去出  
本事詩

緬素雜記及禹錫嘉話載賈島事一謂累舉不第文宗  
時坐飛謗貶長江簿一謂島為僧居法乾寺宣宗微行  
於案上取詩卷覽之島攘臂奪去帝慚恧遂除島長江

簿唐宋遺史所載略同程錡有奪卷忤宣宗之句出鼠璞

賈浪仙主長江簿有題長江詩云歸吏封宵鑰行蛇入古桐桐在縣廳前大觀中縣令胡同老惡其枯枿砍去出能改坐漫錄

李王孫洞避亂入蜀作詩師賈島以銅鑄島像而禮事之

李洞集有贈龍州李郎中先夢六赤後因打葉子因以詩上其詩云紅蠟香烟撲畫楹梅花落盡庾樓清光輝

圓魄啣山冷彩鏤方牙着腕輕寶帖牽來獅子鎮金盆  
引出鳳凰傾徵黃喜兆莊周夢六赤重新擲印成六赤  
者古之瓊爰今之骰子也葉子如今之紙牌酒令鄭氏  
書目有南唐李後主妃周氏編金葉子格此戲今少傳  
見品外錄

夔雲陽人李遠字求古咸通間省元進士有省試萬里  
橋賦初令狐綯擬遠刺杭州上曰吾聞遠詩有長日惟  
消一局碁之句安能理人綯曰此詩人托興之言耳上

曰姑令往試之後轉建州刺史出古今詩話

唐南蠻侵軼西川僖宗幸蜀慮為患以女下降蠻喜姻  
聯大國遣宰相趙降眉楊竒胤段義宗來朝行在高駢  
自淮海飛章云南蠻心脅唯此數人請異待之迨僖宗  
還京無虞用駢計也楊趙輩各有詞藻途中詩云風裏  
浪花吹更白雨中山色洗還青海鷗聚處窻前見林狖  
啼時枕上聽出詩話

高駢築羅城多發掘古冢取輒甃城指揮使姜知古者

當掘一冢夜有鬼嘯於冢上獻一書曰冥司趙畚謹以  
幽昧致書於守禦指揮端公閣下竊以趙氏之冤搏膺  
入夢良夫之枉被髮叫天是以有怨必讎無道則見流  
於往史載在前文如畚也一介遊魂九泉罔象德不勝  
饗禱不勝人無廟貌於世間遂湮沉於泉壤自蒙天譴  
使掌冥司雖叨正直之官未得聰明之理未嘗以威服  
衆唯知以禮依人頃至本朝叨為上相不無濫德敢有  
害盈今者伏審渤海高公令君毀畚墳闕畚謫居幽府



天賜佳城平生無戰伐之讎邂逅起誅夷之釁得不撫  
銘旌而憤志託觚染以申懷伏希端公俯念無依迥垂  
有鑒特於萬雉免此一坏倘全馬鬣之封敢忘龍頭之  
庇謹吟五言四句詩一章後幅上聞不勝望德之至謹  
白詩曰我昔勝君昔君今勝我今人生一世事何用苦  
相侵出成都文類

神女初離碧玉階彤雲猶擁牡丹鞋應知子建憐羅襪  
顧步徘徊拾翠釵此何兆在章仇公席上詠真珠姬也

章仇兼瓊為成都節度使何兆蜀之詩人

羅鄴嘉陵水詩嘉陵南岸雨初收江似秋嵐不煞流此地終朝有行客無人一為棹扁舟不煞流不甚流也殺音近厦今京中諺猶然謂痴曰煞瓜肥曰煞大宋孝宗見容叟隨筆云殺有好處是也已上二則俱出絕句演義

孫定字志元與涪州大戎之族子儲某同學儲長于定定數舉矣儲方欲就貢訪于定定謔曰子儀表堂堂好

將軍材何必以科第為資儲銜之後儲貴達未嘗言定  
過定晚年喪志放意酒杯昭宗景福二年下第遊京西  
宿開遠門醉中走筆寄儲詩曰行行血淚灑塵襟事逐  
東風渭水深秋跨蹇驢風尚緊靜投孤店日初沉一枝  
猶挂東堂夢千里空馳北巷心明月影前愁又去蒲城  
烟樹噪春禽定詩歌千餘首多委於兵火竟無成而卒  
出唐詩紀事

蜀人雍陶以進士第為簡州牧自比謝宣城柳吳興忽

有馮道明者下第請謁告閤者曰道明與員外有舊及  
見呵曰與公昧平生何方相識道明曰誦員外詩仰員  
外德遂吟其白鷺詩曰立當青草人先見行傍白蓮魚  
未知又曰江聲秋入寺雨氣夜清樓又曰閉門客到嘗  
疑病滿院花開不似貧陶間之歡狎如曩昔之友出雲  
溪友議

馬相植罷安南都護與時宰不通又除黔南殊不得意  
維舟峽中古寺寺前長堤畔有林木夜月甚明見人白

衣緩步堤上吟曰截竹為筒作笛吹鳳凰池上鳳凰飛  
勞君更向黔南去即是陶鈞萬彙時歷歷可聽吟者數  
四遣人邀問即已失之後自黔南入為大理卿遷刑部  
侍郎判鹽鐵遂作相出本事詩

唐彥謙絕句詩用事隱僻而諷喻悠遠似李義山如奏  
捷西蜀題沱江驛云野客乘軺非所宜況將儒服報戎  
機錦江不載臨邛酒幸免相如渴病歸即李義山相如  
未是真消渴猶放沱江過錦城之意也出升菴詩話

唐球有詩名如臨池洗硯云恰似有龍深處卧被人驚起黑雲生又有漸寒沙上鷺欲暖水邊村亦佳句也居蜀中味江山方外之士也嘗以詩橐撚為丸納之大瓢中後臨病投瓢於江曰斯文苟不沉沒得者方知吾苦心耳流至新渠有識者曰唐山人瓢也接得之十纔二三其題某處士隱居云不信最清曠及來愁已空數點水泉雨一溪霜葉風業在有山處道成無事中酌盡一尊酒老夫顏亦紅贈行如上人云不知名利苦念佛老

岷峨衲補雲千片香焚篆一窠戀山人事少憐客道心  
多日日齋鐘罷高懸瀝水羅題青城范賢觀云數里緣  
山不厭難為尋真訣問黃冠苔鋪翠點山橋滑松織香  
梢古道寒晝傍綠畦嬌嫩玉夜開紅竈燒新丹孤鐘已  
斷泉聲在風動瑤花月滿壇出古今詩話

紀事載僧陸海奉國寺詩新秋夜何爽露下風轉淒一  
磬竹窻外千燈花塔西按海與陳子昂盧藏用為方外  
十友者奉國寺在閬中

盧延遜入蜀頗為蜀人所易作詩有云莫欺零落殘牙  
齒曾吃紅綾餅餤來延遜光化中放進士第二人燕於  
曲江勅大官賜十八人餅餤蓋唐御食以紅綾餅餤為  
上品也出紀事

歐陽詹云蜀門與林蘊分路後屢有山川似閩中因寄  
林蘊蘊亦閩人也詩云村步如延壽川源似福平無人  
相與識獨自故鄉情自註延壽福平皆閩中川源之名延  
壽蘊之別墅在焉福平即予之別墅在焉出本集按蘊



仕西川節度推官不從劉闢有奇節

唐學士元庭堅左遷遂州叅軍讀書郊外忽見有人身  
而鳥首來造者曰吾衆鳥之主也聞君好音律故來見  
君因留數朝教以音律清濁庭堅後遂著韻英今遂寧  
鳳臺鋪有遺迹也出本志

唐人白行簡以瀘水羅賦得名其警句云焦螟之生必  
全有以小為貴者江漢之流雖大益可一以貫之靈一  
詩曰瀘泉侵月起掃徑避蟲行瀘水益僧家戒律有此

欲全水蟲之命故瀘而後飲今蜀中深山古寺猶有此  
規白居易送文暢詩山宿馴溪虎江行瀘水蟲出丹鉛錄

唐僧隱巖蜀中送人遊廬山詩君遊正值芳春月蜀道  
千山皆秀發谿邊十里五里花雲上三峰五峰雪君上  
匡廬我舊居松蘿擲地十年餘君行試到山前問山鳥  
只今相憶無

唐女郎廉氏峽中即事詩清秋三峽此中去鳴鳥孤猿  
不可聞一道水聲多亂石四時天色少晴雲日暮汎舟

谿漱口那堪夜永思氛氲已上一首納子女郎之奇作也

金堂三學山盤陀石上刻詩一首云拔地山巒秀排空  
殿閣斜雲供數州雨樹獻九天花夜月摩峰頂秋鐘徹  
海涯長松拂星漢一是仙槎不註作者名姓年代要  
非唐人不能辨也本刻九天二字提頭想必隨駕入蜀者

唐張蠙字象文清河人乾寧中進士為犀浦令王建開  
國拜膳部員外郎又為金堂令王衍與徐太后游太慈  
寺見壁間有牆頭細雨垂纖草水面迴風聚落花之句

給札令進詩贖以三百首獻召知制誥不果贖生而顏  
秀幼時作登單于臺詩有白日地中沒黃河天上來之  
句為世所賞出古今詩話

徐畊成都人生二女皆國色教之為詩有藻思王建入  
蜀聞之納於後房生衍及衍嗣位尊為太后太妃同衍  
禱青城山遊丈人觀玄都觀金華宮丹景山至德寺各  
有倡和詩刻石次至漢州三學山夜看聖燈太后賦詩  
曰周遊靈境散幽情千里江山暫得行所恨風光看未

足却驅金翠入龜城太妃詩曰翠驛江亭近蜀京夢魂  
猶是在青城北來出看江山景却被江山見出行出檣  
机

李珣梓州人事王宗衍有詞名瓊瑤集其妹為昭儀亦  
有詞藻摘文類

僧貫休入蜀上王建詩曰一瓶一鉢垂垂老萬水千山  
得得來建大悅賜號禪月因名為得得和尚出五代史  
補

偽蜀武成二年王建游龍華禪院召貫休賜坐及茶藥  
綵段仍令口誦近詩時諸王貴戚皆在貫休欲調之因  
誦公子行曰錦衣鮮華手擎鵲閒行氣貌多輕忽稼穡  
艱難總不知五帝三皇是何物建稱善貴倖皆惡之貫  
休本蘭溪人善詩與齊己齊名有西岳集

闕卷

王蜀樞密使潘炕字凝夢溺于美妾解愁夙恙成疾解  
愁姓趙氏其母夢吞海棠花藥而生有國色善為新聲  
及工小詞建嘗至炕第見之謂曰朕宮無如此人意欲

取之坑曰此臣下賤人不敢以薦于君其實斬之弟峭  
謂曰緣珠之禍可不戒耶坑曰人生貴於適志豈能愛  
死而自不足於心耶人皆服其有守俱禱杭

王蜀偽相周庠初在印南幕中留司府事臨印縣失火  
人黃崇嘏纔下獄貢詩一章周遂召見崇嘏自稱鄉貢  
進士年三十許祇對詳敏立命釋之薦攝府司戶叅軍  
胥吏畏服周既重其聰慧又美其風采欲以女妻之崇  
嘏乃就封狀謝仍貢詩一首落句有曰幕府若容為坦

腹願天速變作男兒周覽詩驚愕遂召詰問乃黃使君  
之女亢未从人周益仰其貞潔亢旋乞罷歸臨邛後不  
知所終出玉漏編

五代眉山楊義方舉進士仕蜀長于詩自以才過羅隱  
嘗有春詩云海邊紅日半離水天外暖風輕到花出本  
志

乾德二年王衍北巡汎舟閬中舟子皆衣錦繡衍自製  
水調銀漢曲令樂工歌之



偽蜀嘉王宗壽每諫爭行不樂燕會衍命宮人李玉簫  
歌其所撰宮詞送宗壽酒宗壽懼禍乃飲佞臣潘任迎  
曰嘉王聞玉簫歌即飲請以玉簫賜之衍曰王必不納  
其歌詞曰輝輝赫赫浮五雲宣華池上月華新月華如  
水浸宮殿有酒不醉真痴人

乾德五年重陽王衍宴羣臣于宣華苑夜分未罷衍自  
唱韓琮柳枝詞曰梁苑隋堤事已空萬條猶舞舊春風  
何須思想千年事誰見楊花入漢宮內侍朱光溥詠胡

曾詩曰吳王恃霸棄雄才貪向姑蘇醉綠醅不覺錢塘  
江月上一宵西送越兵來衍聞之不樂於是罷宴已上  
三則出檣杭

偽蜀丁元和詩九重城闕人中貴五等諸侯閭外尊爭  
似布衣雲水客不將名利挂乾坤

前蜀楊勛好道術後主以其妖怪戮之西市臨刑有詩  
具言後主失國曰聖主何曾識仲都可憐社稷在須臾  
市西便自神仙窟何必乘槎汎五湖已上二則出成都文類

後梁秦隴間謠貓引黑牛天差不自由但看戊寅歲  
颺在蜀江頭朝野僉載曰竹鼯生深山取之甚艱秦隴  
之地此物爭出或穿墉壞城或自門闥而入犬食不盡  
則並入人家房內秦民之口腹歛焉故童謠云云庚午  
歲劉知俊叛梁入秦天水破入蜀王建殺之粉其骨揚  
入蜀江正戊寅歲也出五代史

朝野僉載永平末劉知俊奔蜀王建雖加寵待然心疑  
之常曰劉知俊非能駕馭者也有嫉之者作謠曰黑牛

無係絆搜繩一朝斷以知俊丑生而黑建諸子皆以宗承為名也竟致猜疑而殺之

王建據蜀之後有一僧常持大帚每過即汎掃人以掃地和尚目之掃畢輒寫云水行仙怕秦川其後王衍秦川之禍人方悟水行仙衍字也出風謠

衍在蜀時童謠曰我有一帖藥其名為阿魏賣與十八子乾德末衍兄宗弼果賣國歸唐而宗弼乃王建養子本姓魏氏此其應也出青箱雜記

孟蜀廣政元年上巳景遊大慈寺宴從官于玉溪院賦  
詩十二年遊浣花溪御龍舟觀水嬉珠翠綺羅名花異  
卉羅列十里人望之如神仙之境景曰曲江金殿鎖千  
門迨未及此兵部尚書王珪賦詩十字水中分島嶼  
數重花外見樓臺景稱善之

廣政十四年孟主宴後苑放士庶入觀時俳優有唱康  
老子者昶問李昊等其曲所出皆不能對徐光浦曰康  
老老而無子故制此曲唐英按康老子即長安富家子

開元中落拓不事生業好與梨園樂工遊一旦家資蕩盡窮悴而卒樂工歎之因此為曲又一名曰得至寶光浦不知而妄對也已上二則出擣杓

古人詩句不知其用意用事妄改一字便不佳孟蜀牛嶠楊柳枝詞吳王宮裡色偏深一簇烟條萬縷金不分錢塘蘇小小引郎松下結同心按古樂府小小歌有云妾乘油壁車郎乘青驄馬何處結同心西陵松栢下牛詩因詠柳而貶松唐人士所謂尊題格也後人改松下作

枝下語意索然矣出丹鉛錄

孟蜀後主崇尚六經恐石經本傳流不廣乃易為木板  
宋世稱刻本書始於蜀也景嘗曰我不效王衍作輕薄  
小詞乃敕史館集古今韻會數百卷惜不傳今所傳昭  
武黃公劄者乃輯略耳

吳曾能改齋漫錄云徐匡璋納女于孟昶拜貴妃別號  
花藥夫人意花不足擬其色似花藥翹輕也又升號慧  
妃以號如其性也王師平蜀太祖聞其名命別將護送

入京陳無已以夫人姓費誤也

曾子固云蜀花藥夫人者本青城費氏女以才色嬖于後主嘗效王建作宮詞百首國亡入後宮太祖聞之召使陳詩誦其國亡詩云君王城上揭降旗妾在深宮那得知十四萬人齊解甲更無一箇是男兒太祖悅蓋當時蜀兵尚十四萬耳此陳無已所書也王平甫在崇文院錄其宮詞十數篇因敘之曰熙寧五年臣安國奉詔定蜀民秦民秦民三家所獻書可入三館者令令史李



希顏料理之其書多剝脫而得一散紙所書花藥夫人  
詩筆書乃出于花藥手而詞甚奇與王建宮詞無異建  
詞自唐至今誦者不絕口而此獨遺棄不見取前受詔  
定三家書者又斥去之甚可惜也臣令令史郭祥繕寫  
入三館而歸口誦數篇於丞相安石明日與中書語及  
之而王珪馮京願傳其本於是盛行於時花藥者偽蜀  
孟昶侍人事在國史平甫所敘云爾按平甫稱花藥事  
見國史今國史乃無花藥事不知平甫何所見也宮詞

才二十八首今附左方亦以見當時游衍僭侈云余按王平甫所敘實三十二首刻在成都文類中楊用脩尋得其逸詩六十六首又補入宮詞三首共一百一首其末首鴛鴦瓦上自然聲者趙與時賓退錄云不知名李珣瓊瑤集以為王衍宮人李玉箒作實只一百首

花蘂夫人宮詞之外尤工樂府蜀亡入汴道經葭萌題驛壁云初離蜀道心將碎離恨綿綿春日如年馬上時時聞杜鵑書未畢為軍騎催行後人續之云三千宮女

皆花貌妾最嬋娟此去朝天只恐君王寵愛偏花藥見  
宋祖時猶作更無一箇是男兒之詩焉有隨景行而書  
此敗節語乎續之者不惟虛空架橋而詞之鄙亦狗尾  
續貂矣出丹鉛錄

唐世蜀之詩人射洪陳子昂彰明李白成都李餘雍陶  
裴廷裕岑倫符載雍裕之苑咸朱桃李推雙流柳震青城  
杜光庭嘉州唐球青神陳詠丹稜僧可朋綿州布衣王  
嚴鄉貢進士劉暎及李涯田章巴州張曙若劉灣鹿虔

庾毛文錫俱蜀人若劉蛻張蠩韋莊牛嶠歐陽炯劉猛  
李季蘭張演薛濤張窈窕杜羔妻皆他方流寓而老於  
蜀者嘗欲哀集其詩為一帙而未暇焉出升菴詩話

蜀中廣記卷一百二

欽定四庫全書

蜀中廣記卷一百三

明 曹學佺 撰

詩話記第三

孟蜀每歲除日諸宮門各給桃符書元亨利貞四字時  
昶子善書札取本宮策勲府符書云天垂餘慶地接長  
春乾德中伐蜀明年蜀除二月以兵部侍郎呂餘慶知  
軍府事以策勲府為治所太祖聖節又號長春此天垂

地接之兆也出鑑戒錄

古今詩話云宋太祖采聽明遠每邊事纖悉必知有間者自蜀還上問劒外有何事間者曰但聞成都滿城誦朱山長苦熱詩曰煩暑鬱蒸無處避涼風清冷幾時來上曰此蜀民思吾伐也然予考睦台符岷山異事云梓潼山人李堯夫吟詠尚譏刺謁蜀相李昊昊戲曰何名之背時耶堯夫厲色對曰甘作堯時夫不樂蜀中相因是為昊所擯自吟苦熱詩云炎暑鬱蒸無處避涼風消

息幾時來以是知此兩句乃李堯夫詩非朱山長也清  
冷兩字不逮消息遠甚堯夫又有大內盆池詩云向外  
疑無地其中別有天蜀平後贈滕白郎中詩云方外共  
推為道友關中獨自占詩家譏滕入蜀詩家惟堯夫耳  
出能改齋漫錄

蜀父老相傳岷山有焦夫子宋初人貌寢陋且恠修目  
而廣眉海口而蚪髯癭纍纍絡頷下性真率雖冠蓋見  
之往往爬痒捫虱腰袴間忽為詩歌則奇言異句駭人

觀聽有誦其一聯云兩輪日月磨興廢一合乾坤夾是  
非出舊誌

建隆初有人泊舟巴峽夜聞人咏曰秋徑堆黃葉懸崖  
露草根猿聲一叫斷客淚數重痕通宵凡吟百過又有  
梁伯升者肄業廢宅中夢一女子綠裙紅袖呼梁君聽  
妾幽恨之句詩曰卜得上峽日秋來風浪多江陵一夜  
雨腸斷木蘭歌出縉紳胄說

張乖崖公布衣時素善陳搏嘗因夜話謂搏曰某欲分



先生華山一半住得無搏曰餘人則不可先輩則可及  
旦取別搏以宣毫十枝白雲臺墨一劑蜀牋一角為贈  
公謂搏曰會得先生意取某入閘處去曰珍重搏送公  
回謂弟子曰斯人無情于物達則為公卿不達為王者  
師公常感之後尹蜀乘傳過華陰寄搏詩曰性愚不肯  
林泉住強要清流擬致君今日星馳劔南去回頭慚愧  
華山雲出青箱雜記

又云公席上贈官妓小英歌曰天教搏百媚相映明如

花住近桃花坊正面門庭掩映如仙家美人宜稱言不  
得龍腦薰衣香入骨維揚軟縠如雲英毫郡輕紗似蟬  
翼我疑天上婺女星之精偷入筵中名小英又疑王母  
侍兒初失意謫向人間為歌妓不然何得膚如紅玉初  
碾成眼似秋波雙臉橫舞態因風欲飛去歌聲過雲長  
且清有時歌罷下香砌幾人魂魄遙相驚人看小英心  
已足我見小英心未足為我高歌送一杯我今贈汝新  
翻曲按公鐵石心人在蜀娶婢三年後歸其父猶然完

壁此詩亦靖節閒情廣平梅花之意也然歲華紀麗稱  
浣花小遊江起于公蓋亦不厭遊戲云

方輿勝覽載公在蜀有錄曹叅軍老病廢事公責之曰  
何故不歸明日叅軍求去且以詩留別其畧云秋光多  
似宦情薄山色不如歸興濃公驚歎曰吾過矣同僚能  
詩而吾不知乃留而慰薦之

蜀人魏野隱居不仕善為詩卜居陝州東門外有陝州  
平陸縣詩云寒食花藏縣重陽菊遶灣一聲離岸櫓數

點別州山最為警句當世顯人多與之遊冠忠愍尤愛之嘗有贈忠愍詩云好向上天辭富貴却來平地作神仙後忠愍鎮北都召野置門下北都有妓女美色而舉止生硬土人謂之生張八因府會忠愍令乞詩于野野贈之詩曰君為北道生張八我是西州熟魏三莫道樽前無笑語半生半熟未相諳出夢溪筆談

世傳野嘗從萊公遊陝府僧舍各有留題後復同游見萊公詩已用碧紗籠護而野詩獨否塵昏滿壁時有從

行官妓頗慧黠即以袂就拂之野徐曰若得常將紅袖拂也應勝似碧紗籠萊公大咲出青箱雜記

宋子京知成都帶唐書于本任刊修每宴罷盥漱畢開寢門垂一簾燃二椽燭媵婢夾侍和墨伸紙遠近觀者皆知尚書修唐書望之若神仙焉景文作詩纖麗號西昆體而成都文類有咏海棠排律更佳

趙清獻知成都日以一琴一鶴自隨及再至屏去龜鶴止一蒼頭執事張公裕作詩送之云馬踏舊路行來滑

龜放長江不共來復觀王素聽運使閱道殿院撫琴詩  
亦云雷琴一張龜一隻惟將二物娛幽情可知清獻攜  
鶴之外又攜龜矣

范成大新作官梅庄又有種竹了戲題愛山亭詩皆宣  
華廢苑又有雨後東郭排岸司申梅開及三分戲書小  
絕令一面開宴當時風味猶可想見

范成大詩註蜀人鄉音極難解其為京洛音輒謂之虜  
語或是僭偽時以中國自居循習至今不改也既又諱

之改為魯語尤可咲故就用其字云耳畔逢人無魯語  
演和尚云禪人回到成都切須記取魯語

文彥博慶厯間知益州多燕集有飛語至京師御史何  
郊聖從謁告歸里上遣伺察之張俞少愚潞公客也迎  
見聖從于漢州有營妓楊姓者善舞聖從喜之少愚因  
取項帕題詩曰蜀國佳人號細腰東臺御史惜妖嬈從  
今喚作陽臺柳舞盡春風萬萬條後數日聖從至成都  
頗嚴重一日潞公大作樂以宴之迎此妓雜府妓中歌

少愚之詩以酌聖從每為之醉及還朝潞公之謗乃息此與陶穀使江南事頗同

鄭剛中鎮蜀眷妓曰閻玉所居富春坊忽民間遺火鄭公于火明中獲一旗上有詩乃借東坡海棠為之云火星飛入富春坊天恣風流此夜狂只恐夜深花睡去高燒銀燭照紅粧公一見曰必道山公子也楊曼倩古今詞語中亦有此詩出白獺髓

范景仁鎮喜為詩年六十三致仕一朝思鄉里遂輕行



入蜀故人李才元大臨知梓州景仁枉道過之歸至成都日與鄉人樂飲散財於親舊之貧者遂遊峨眉青城山下巫峽出荆門凡期歲乃還京師在道作詩凡二百五篇其一聯云不學鄉人誇駟馬未饒吾祖泛扁舟此二事他人所不能用也出溫公詩話

仁壽龍昌期初謁王荆公安石投刺稱詩人左右曰何物書生敢于丞相前稱詩人耶公揖之入值軍人運沙遂命賦此應聲云茫茫黃出塞漠漠白鋪汀鳥去風平

篆潮回日射星公大賞之出本志

張安道與歐文忠素不相能慶厯初杜祁公韓富范四人在朝欲有所為文忠為諫官協佐之而前日呂申公所用人多不然於是諸人皆以朋黨罷去而安道繼為中丞頗彈擊以前事二人遂交怨蓋趣操各有主也嘉祐初安道守成都文忠為翰林蘇明允父子自眉州走成都將求知安道安道曰吾何足以為重其歐陽永叔乎乃為作書辨裝使人送之京師謁文忠文忠得明允

父子所著書大喜曰後來文章當在此即極力推譽天下于是高此兩人子瞻兄弟後出入四十餘年雖物議于二人各不同而亦未嘗敢有纖毫輕重于其間也出石林避暑錄

老泉攜東坡穎濱謁文定公時方習制科業將應詔文定公忽出題令人持與坡穎云請學士擬試文定公于壁間窺之兩公得題各就坐致思穎於一題有疑指以示坡坡不言但舉筆倒敲几上云管子注穎濱疑而未

決也又指其次東坡以筆勾去即擬撰出以納文定閱其文益喜勾去一題乃無出處文定欲試之也次日文定見老泉云二子皆天才長者明敏尤可愛然少者謹重成就或過之所以二公受知文定而潁濱感之尤深出瑞桂堂暇錄

老泉布衣時初未有名雅安守劉太簡簡夫獨深知之以書薦於韓魏公歐陽文忠公張文定公辭甚切至文亦高雅今蜀人多傳其本而東坡潁濱二公獨無一語

及太簡者老泉集中與太簡往來亦止有辭召試一書耳如與太簡請納拜蜀人至今傳集亦不載初疑偶然久之又得老蘇所作太簡墓銘亦不在集中乃知編集時有意刪去不知其意果何在也出老學菴續筆

蘇明允至和間來京師既為歐陽文忠公所知其名翕然韓忠憲諸公皆待以上客嘗遇重陽忠憲置酒私第惟文忠與一二執政而明允乃以布衣參其間都人為異禮席間賦詩明允有佳節屢從愁裏過壯心時傍

醉中來之句其意氣尤不少衰明允詩不多見然精深有味語不徒發正類其文如讀易詩云誰為善相應嫌瘦後有知音可廢彈婉而不迫哀而不傷所作自不必多也出石林詩話

東坡老翁泉詩井中老翁娛年華白沙翠石公之家公來無踪去無跡井面團露水生花翁今與世兩無與何事紛紛驚牧豎改顏易服與世同無使世人知有翁說家又載東坡圖書刻有老泉二字如此則老泉之號未

應屬明允也

洪容齋隨筆言東坡慕白樂天因以為號慎按南賓志  
東坡西坡皆白文公故迹樊漢炳詩曰忠黃江上兩東  
坡二老遺風凜不磨人得矜誇知地勝天教流落為才  
多以此驗之信然出丹鉛錄

予嘗夢客有攜詩相過者覺而記其一詩云道惡賊其  
身忠先愛厥親誰知畏九折亦自是忠臣又有數句若  
銘贊者云道之所以成不害其耕德之所以修不賊其

牛出志林

東坡先生在嶺南言元祐中有見李白在酒肆中誦其  
近詩云朝披夢澤雲笠釣青茫茫此非世人語也少游  
嘗手錄其全篇敘云觀頃在京師有道人相訪風骨甚  
異語論不凡自云嘗與物外諸公往還口誦二篇云東  
華上清監清逸真人李白作也詩云人生燭上花光滅  
巧妍盡春風遶樹頭日與化工進昔我飛骨時慘見當  
塗墳青松靄朝霞縹緲山下村既死明月魄無復玻璃



魂念此一脫洒長嘯登崑崙醉着鸞鳳衣星斗俯可捫  
又云朝披夢澤雲笠釣青茫茫尋流得雙鯉中有三元  
章篆字若月蛇逸勢如飛翔歸來問天姥妙義不可量  
金刀割青素靈文爛煌煌燕服十二環想見仙人房暮  
跨紫鱗去海氣侵肌涼龍子善變化化作梅花粧遺我  
累累珠靡非明月光勸我穿絳縷繫作裙間褱揖予以  
疾去談笑聞餘香出侯鯖錄

子瞻嘗於涓井監得西南夷人所賣蠻布弓衣其文織

成梅聖俞春雪詩一首朔風三日暗吹沙蛟龍卷起噴  
成花花飛萬里奪曉月白石爛堆愁女媧大明廣庭踏  
朝賀雉尾不掃粘官靴宮中才人承聖顏奉觴稱壽呼  
南山三公免責百姓喜斗酒十千誰復慳此詩在聖俞  
集中未為絕唱蓋其名重天下一篇一詠傳落夷狄而  
異域之人貴重之如此耳予瞻以余尤知聖俞者得之  
因以見遺余家舊畜琴一張乃寶厯三年雷會所斷距今  
二百五十年矣其聲清越如擊金石遂以此布更為琴

囊二物真余家之寶玩也出六一詩話

東坡送戴蒙赴成都玉局觀詩云拾遺被酒行歌處野  
橋官柳西郊路聞道華陽版籍中至今尚有城南杜按  
費著氏族譜稱少陵之後者係宗武所傳予閱眉州志  
杜莘老青神人甫十三世孫坡後亦提舉玉局觀未赴

東坡云吾昔自杭移高密與楊元素同舟而陳令舉張  
子野皆從予過李公擇於湖遂與劉孝叔俱至松江夜  
半月出置酒垂虹亭上子野年八十五以歌辭聞於天

下作定風波令其畧云見說賢人聚吳興試問也應傍  
有老人星坐客歡甚有醉倒者此樂未嘗忘也去今又  
七年子野孝叔令舉皆為異物而松江橋亭今歲七月  
九日海風駕潮平地丈餘蕩盡無復子遺追思曩時真  
一夢爾按苕溪漁隱曰吳興郡圃今有六客亭即公擇  
子瞻元素子野令舉孝叔時公擇守吳興也東坡又云  
余昔與張子野劉孝叔李公擇陳令舉楊元素會於吳  
興時子野作六客辭其卒章云盡道賢人聚吳興試問

也應傍有老人星凡十五年再過吳興而五人皆已亡  
矣時張仲謀與曹子方劉景文蘇伯固張秉道為坐客  
仲謀請作後六客辭云月滿苕溪照野堂五星聚處一  
老闢光芒十五年間真夢裡何事長庚對月獨淒涼綠  
髮蒼顏同一醉還是六人吟嘯水雲鄉賓主談鋒誰得似  
看取曹劉今對兩蘇張出綿竹志元素綿竹人

章荅字隱之本閩人遷於成都數世矣善屬文不仕晚  
用太守王素薦賜號冲退處士一日夢有人寄書召之

者云東岳道士書也明日與李士寧遊青城濯足水中  
答謂士寧曰脚踏西溪流去水土寧答曰手持東岳寄  
來書答大驚不知其所自來也未幾答果死士寧達州  
人也語默不常蓋得道者百歲乃死常見予成都曰子  
甚貴當策舉首已而果然出志林

東坡云趙伯成家有麗人僕忝鄉人不肯開樽徒吟春  
雪美句因次其韻一笑詩云朱簾綉戶未曾開誰見梅  
花落鏡臺試問高吟三十韻何如低唱兩三杯莫嫌衰

髧聊相映須得纖腰與共回知道文君隔青瑣梁園賦  
客肯言才仍自注其末聊荅來句義取一人而已罪過  
罪過出古今詩話

子由一字同叔東坡有還須畧報老同叔之語又元日  
立春云己卯嘉辰壽阿同元日己卯為子由本命出霏  
雪錄子瞻一字和仲見子由所作墓誌

蘇小妹老蘇先生之女幼而好學慷慨能文適其母兄  
程濬之子之才先生有詩曰汝母之兄汝伯舅求以厥

子來結姻鄉人嫁娶重母族雖我不肯將安云人言蘇子無妹却有此詩出蘇氏小抄

東坡詩云清吟雜夢寐得句旋已忘固已奇矣晚謫惠州復出一聯云春江有佳句我醉墮渺莽則又加於少作一等近世詩人老而益嚴蓋未有如東坡者也學者或以易心讀之何哉淳熙九年五月二十六日玉局祠吏陸游書于鏡湖下鷗亭

文同與可蜀人與蘇子瞻厚為人靖深超然不嬰世故



善畫墨竹作詩騷亦過人熙寧初時論既不一士大夫  
好惡紛然同在館閣未嘗有所向背時子瞻數上書論  
天下事退而與賓客言亦多以時事為譏誚同極以為  
不然每苦口力戒之子瞻不能聽也出為杭州通判同  
送行詩云北客若來休問事西湖雖好莫吟詩及黃州  
之謫正坐杭州詩語人以為知言出石林詩話

予在成都偶以事至犀浦過松林甚茂問馭卒此何處  
荅曰師塔也蓋謂僧所葬之塔於是乃悟杜詩黃師塔

前江水東之句已下三則俱老學菴筆記

予遊大邑鶴鳴觀所謂張天師鶴鳴化也其東北絕頂  
又有上清宮壁間有文與可題一絕曰天氣陰陰別作  
寒夕陽林下動歸鞍忽聞人報後山雪更上上清宮上  
看

漢嘉城西北山麓有一石洞泉出其間時聞洞中泉滴  
聲良久一滴清如金石黃魯直題詩云古人題作丁東  
水自古丁東直到今我為改名方響洞要知山水有清

音

紹聖二年四月甲申山谷以史事謫黔南道間作竹枝  
詞二篇題歌羅驛曰撐厓拄谷蝮蛇愁入箐攀天猿掉  
頭鬼門關外莫言遠五十三驛是皇州浮雲一百八盤  
縈落日四十九渡明鬼門關外莫言遠四海一家皆弟  
兄自書其後曰古樂府有巴東三峽巫峽長猿鳴三聲  
淚沾裳但以抑怨之音和為數疊惜其聲今不傳余自  
荊州上峽入黔中備嘗山川阻險因作二疊傳與巴娘

今以竹枝歌之前一疊可和云鬼門關外莫言遠五十  
三驛是皇州後一疊可和云鬼門關外莫言遠四海一  
家皆弟兄或各用四句入陽關小秦王亦可歌也是夜  
宿於驛夢李白相見於山間曰予往謫夜郎於此聞杜  
鵑作竹枝詞三疊世傳之不予細憶集中無有三誦而  
使之傳焉其詞曰一聲望帝花片飛萬里明妃雪打圍  
馬上胡兒那解聽琵琶應道不如歸竹竿坡面蛇倒退  
摩圍山腰猢猻孫愁杜鵑無血可續淚何日金雞赦九州

命輕人鮓甕頭船日瘦鬼門關外天北人墮淚南人笑  
青壁無梯聞杜鵑今豫章集所刊蓋自謂夢中語也音  
響節奏似矣而不能揜其真亦寓言之流歟程史

史琰字炎玉好學嫺文州刺史張閭聘為家子祺之配  
祺亦有才與炎玉酬唱成集題曰和鳴作字用禿筆體  
法古勁黃山谷與祺父有內親而祺弟祉亦以進士為  
青神尉山谷親來訪之炎玉致書嘗緘綠菜以贈山谷  
為之贊曰蔡蒙之下彼江一曲有茹生之可以為菰蛙

蟻之衣采采盈掬  
以辛鹹宜酒宜餼  
在吳則紫在蜀則  
綠其臭味同遠故  
不錄頌我肯畜史  
君炎玉出眉州志

涪翁過瀘南瀘帥留府會有官妓盼盼帥嘗寵之涪翁  
贈浣沙溪詞曰脚上靴兒四寸羅唇邊朱麝一櫻多見  
人無語但迴波料得有心憐宋玉祇因無奈楚襄何今  
生有分向伊麼盼盼拜謝涪翁瀘帥令唱詞侑觴唱惜  
春容涪翁大喜醉飲而別出山堂肆考

魯直詩序云覺範道人種竹於所居之東軒使君楊夢  
貺題其軒曰也足取古人但有歲寒心兩三竿也足之  
句仍為之賦詩余輒次韻云道人手種兩三竹使君忽  
來唾珠玉不須客賦千首詩若是賞音一夔足世人愛  
處但同流一絲不掛似太俗客來若問有何好道人優  
曇遠山綠按其地在簡池郡南一里景德觀

魯直量移戎州丹稜楊素從之游魯直曰安得奇士而  
有力者盡刻杜子美在蜀所作使大雅之音復盈三巴

耳哉素聞之欣然請攻堅砥慕善工作華堂以宇之黃  
偉其言悉書子美詩遺之因以大雅名堂且為之記

陸放翁之蜀宿一驛中見題壁云玉階蟋蟀聞清夜金  
井梧桐辭故枝一枕淒涼眠不得呼燈起作感秋詩放  
翁詢之驛卒女也遂納為妾方餘半載夫人逐之妾賦  
卜筭子云只知眉上愁不知愁來路窻外有芭蕉陣陣  
黃昏雨曉起理殘粧整頓教愁去不合畫春山依舊留  
愁住出隨隱漫錄



放翁在蜀日有所盼嘗賦詩云碧玉當年未破瓜學成  
歌舞入侯家如今顚顚蓬窻底飛上青天妬落花出蜀  
後每懷舊游多見之賦詠有云金鞭珠彈憶春游萬里  
橋東罨畫樓夢倩晚風吹不斷書憑春雁寄無由鏡中  
顏髮今如此席上賓朋好在不篋有吳牋三百箇擬將  
細字寫春愁又云裘馬清狂錦水濱最繁華地作閒人  
金壺投箭箭消長日翠袖傳杯領好春幽鳥語隨歌處拍  
落花鋪作舞時茵悠然自適君知否身與浮名孰是親

又以此詩彙括作風入松云十年裘馬錦江濱酒隱紅  
塵黃金選勝鶯花海倚疎狂驅使青春吹笛魚龍盡出  
題詩風月俱新自憐華髮滿紗巾猶是官身鳳樓曾記  
當年語問浮名何似身親欲寫吳牋說與這回真箇閒  
人出矣辛襟識

韓駒詩題云仙泉虞童子郎使者聞諸朝三年不加考  
故作二絕以贈之歸七歲瀾翻數萬言饑鷹引子望  
騰騫時人不識甘羅輩寂寞題詩歸故園不作西京童

子郎時人何自識黃香還鄉再誦五千卷十八重來謁  
太常按此即漢時童子郎 國初嘗有此選蜀中相傳  
成弘間新都楊文忠公亦在選列

駒字子蒼仙井人今併入仁壽作詩法名陵陽正法眼  
呂仁作江西詩派圖置駒其間而駒不悅

右陵陽先生韓子蒼詩草一卷得之其孫籍先生詩擅  
名天下然反覆塗乙又歷疏語所從來其嚴如此可為  
後輩法矣予聞先生詩成既以予人久或累月遠或千

里復追取更定無毫髮恨迺止則此草亦未必皆定本也  
大歇菴詩一章徐師川作而先生手錄之亦足見其無  
昔人爭名之病矣故附見卷中淳熙庚子四月二十  
二日笠澤陸游書

唐子西嘗見桃李盛開而梅尚存數枝因作詩時張無  
盡天覺被召乃以詩投之云桃花能紅李能白春來何  
處無顏色不應尚有一枝梅可是東君苦留客向來開  
處當嚴冬桃李未在交游中只今已是文人行勿與少

年爭春風無盡大加稱賞出墨庄漫錄

兵部侍郎劉朝美儀鳳普州人性酷嗜書喜傳錄初以  
禮部郎兼攝秘書少監後即真凡秘府書籍傳寫殆遍  
如國史之類又置副本親自校勘至杜門絕交遷兵侍  
猶傳寫不已張持國為副端言其書癖至曠廢職事以  
是罷歸蜀詩人關壽卿為著作佐郎以詩餞行曰公議  
久不作世無真是非祇因翻故紙不覺蹈危機東壁夢  
初斷西山蕨正肥十年成底事贏得載書歸出庾溪詩

話

李燾過成都淨名院曰觸目都似曾到問訊乃非也其  
自題龍鵲山房詩云已作清時鳥亂飛杜鵑更勸阿誰  
歸似嫌住處猶城郭不解攜家隱翠微極有風韻可想

陳甲字升父隆州人紹興間為蜀帥李公瑋之客館于  
雙竹齋夜見數婦笑語有吟兩絕句者因忽不見曉雨  
廉纖梅子黃晚雲卷雨月侵廊樹陰把酒不成飲說著  
無情更斷腸舊時衣服盡雲霞不到迎仙不是家今日

樓臺渾不識祇因古木記宣華

朱乘題雁八月新霜岸草枯數聲哀怨雁來初憑君試  
向沙汀看恐帶匈奴二帝書高宗聞之歎曰此人頗有  
愛君之心出保寧府誌

蘇雲卿與張魏公浚友魏公既相雲卿隱豫章東湖鬻  
蔬自給公托漕帥聘之微服乃得見詰朝再至則閉關  
矣啓之惟書與金在不啓封曾蒼山作歌云東湖湖面  
波渺瀰東湖岸上春土肥先生鋤雲明月曉種來蔬甲

今成畦把茅蕭蕭環四壁此身不願人間識乾坤清夷  
那復知寸心杳緲黃塵隔故人子房今九雲交情不斷  
江湖濱江西使漕卻騶騎故作敲門問字人黃金百鎰戕  
一幅多謝春風到茅屋君為使者吾邦民見君容我更  
樵服故人與我情重哉君且歸矣明當來明朝啓扉人  
不見黃金不動書不開使者持書三太息封書徑上黃  
扉側翩翩鶴馭雲冥冥空向湖山訪行跡向來桐江嚴  
子陵曾得故人雙眼青芒鞋却踏金華路太史驚誇說



客星先生得書掉頭去併此湖光不回顧夢夫孀婦截  
髯鬟亦有老大閨中女蒼山此歌可激貪鄙張世南遊  
宦紀聞載宋隱逸記蘇翁本末甚詳

謝慧卿已謝氏女也頗能詩雖不盡合亦一方之秀有  
竊仙自樂詩云尋得桃源可悟仙丹書惟恐鳳飛傳雨  
收峰頂雲歸洞風到池塘月滿天清脫可喜有閨餘集  
題咏甚富出河上楮談

成都女郎張窈窕上任事者詩曰昨日買衣裳今朝賣

衣裳衣裳都賣盡羞見嫁時廂有賣愁應緩無時心轉  
傷故園千里隔何處是春桑出鑑戒錄

閨中壽聖院僧冲古者工於詩其挽光獻太后云昔補  
一天成大業晚扶雙日擢重離有詩五百餘篇題曰錦  
屏集又僧惟聰能詩曾賦春陰云好花分日少閒草占  
春多亦佳句也眉陽人見本志

蜀僧號峨眉道者戒律甚嚴不下山二十年一日有布  
衣青裘昂然一偉人來與語良久期以明年是日復相

見於此願少見待明年是日方午道者沐浴端坐而逝  
至暮偉人果來問道者安在曰亡矣偉人歎息良久書  
數語於堂側壁間絕高處語云落日斜西風冷幽人今  
夜來不來教人立盡梧桐影字畫飛動如翔鸞舞鳳非  
世間筆也或云呂洞賓作出竹坡詩話

蜀僧希晝游雁蕩山云天長來月正木末度猿猱苔黃  
桂州云東書逢歲嗣去夢歷峯危送廣漕云春生桂嶺  
外人在海門西送僧東歸云帆雲先寒雁經聲隱暮潮

宋承旨林亭云雪溜垂危石棋燈射遠林贈僧云漱齒  
冰溪遠聞蟬雲屋深送人云玉繩天闕近金柝海城秋  
贈勾學士云曉天金馬路晚歲石霜心寄人云山日秋  
光短江虹晚影低送新津尉云劍月啼猿苦江沙濯錦  
寒北宮書亭云花露盈虫穴梁塵墮燕泥贈闕上人云  
寄禪闕樹老乞食塞城荒送僧歸新安云風泉舊聽僧  
窻改雲火曾行鳥徑殘春山云芳樹侵雲老孤泉落石  
危送人歸南海云落日橫秋島寒濤兀夜船出談苑

長和國使人布變聽蜀妓洞雲歌詩云嵇叔夜鼓琴飲  
酒無閒暇若使當時聞此歌拋擲廣陵都不藉劉伯倫  
虛生浪死過青春一飲一石猶自醉無人為爾卜深塵  
出鑑戒錄

漢州崇聖寺寒食日忽有朱衣一人紫衣一人氣貌甚  
偉驅殿僕馬極盛寺僧謂州官至奔出迎接皆非也與  
僧展揖甚恭唯少言語命筆各題一絕句于壁朱衣詩  
曰禁煙佳節同遊此正值茶釀夾岸香緬想十年前往

事強吟風景亂愁腸紫衣詩曰策馬暫尋原上路落花  
芳草尚依然家亡國破一場夢惆悵又逢寒食天題罷  
上馬疾去出松徑失其所在但覺異香經月不散其詩  
于今見存出玉堂閣話

虞伯生先生集楊仲弘先生載同在京日楊先生每言  
伯生不能作詩虞先生載酒請問作詩之法楊先生酒  
既酣盡為傾倒虞先生遂超悟其理繼有詩送袁伯長  
先生楠扈駕上都以所作詩介他人質諸楊先生先生

曰此詩非虞伯生不能也或曰先生嘗謂伯生不能作詩何以有此曰伯生學問高余曾授以作詩法餘莫能及又以詣趙魏公孟頫詩中有山連閣道晨留輦野散周廬夜屬橐之句公曰美則美矣若改山為天野為星則尤美虞先生深服之故國朝之詩稱虞趙楊范揭焉范即德機先生桴揭即曼碩先生篋斯也嘗有問於虞先生曰仲弘詩如何先生曰仲弘詩如百戰健兒德機詩如何曰德機詩如唐臨晉帖曼碩詩如何曰曼碩云美

女簪花先生詩如何笑曰虞某漢廷老吏蓋先生未免  
自負公論以為然出輟耕錄

蜀中廣記卷一百三